



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 7

Maha Kumbh ya 'Mrityu Kumbh-i melen: Mamata

Ni meyipa arutsü, linük asoshi takum agütsür mang ayangtsü: Sheikh Hasina

VOL. XXII ISSUE NO. 126 (ADOK 126) DIMAPUR RASEMNÜ (WEDNESDAY) TSÜKLAI (FEBRUARY) 19, 2025 ₹ 5.00

Naga kintemi 'Public Declaration' ayimoktsür

Dimapur, February 18, 2025 (TYO): February 18, 2025 nü Naga kin balala aser Forum for Naga Reconciliation (FNR) senden ka amendang Naga Political Groups ajak ka akümtsü aser amalitep alitsü tayongzükba agütsüogo.

Parnokisa January 14, 2025 Treatise ajanga maparen tajungtem inyaka aruba atema tenüngsang agütsüogo.

Naga Political Groups-i nübortem ola angatsüla aser ka ta asüba tangatetba nung Naga nunger longjemtsü atema merangtsüla ta parnoki ayongzük.

Naga nunger longjemtsü aser putepshitsü atema January 14, 2025 Treatise tangsa mapa kuma tenzüktsüla. Naga Political

Groups ajak aser Naga nungertemi Council of Naga Cooperation and Relationship nung shilem agitsü ayongzük. Naga Political Group aser civil society organization kari iba mapa nung tamakok ngudaktsüra parnoki iba tebilemtsü khuret abentsü ta parnoki 'Public declaration' nung shia lir.

Iba senden nung Chakhesang Public Organization (CPO), Rengma Hoho, Pochury Hoho, Sümi Hoho, Phom People's Council, Tikhir Tribal Council, Chang Union Dimapur, Chang Khulei Setshang, Mao Council, Angami Public Organisation, Ao Senso Telongjem Dimapur, Ao Senden, aser Tangkhul Naga Long aden.

AICC Secretary in charge-i Peren aser Dimapur semdang

Dimapur, February 18, 2025 (TYO): February 18, 2025 nü All India Congress Committee (AICC) Secretary in charge of Nagaland Christopher Tilak-i Peren aser Dimapur district tem semdangogo.

Tanü Christopher Tilak den külemi MP & PCC President S Supongmeren Jamir, Working President, NPCC Khriedi Theunuo aser party lennir aikati district ana semdang liasü.

"Telongjem alitsü aser telongjem ya tashi lir. Congress Party-i secularism aser iba tangatetba nung noktaka lir" ta Khriedi Theunuo-i o jembidang ashi.

Taoba General Elections nung Nagaland nung alirtemi Congress yariba atema tenüngsang agütsür aser Naga nunger longjemogo, ta pai ashi.

Lok Sabha election results ajanga nübortemi temelenshi aginüba sayuogo aser Congress-i Constitution aser democratic tangatetba nung akangkanga noktaka lir, ta Theunuo-isa shisem.

"2028 nung Congress Party-i Nagaland nung sorkar akümtsü atema nükjidong ayutsüla. DCC Peren aser pamok kübok ACCCs anati MLA ka adokdaktsütsü

atema teküpokba jenjang nungi mapa inyaksüla" ta MP S. Supongmeren Jamir-ia ashi.

Nüngdakra party inyaksangshi yanglushitsü aser party taginüba nung rangloksü. Asenoki sentong tajung atonga inyakra taruba election tem nung Congress-i takok angutsü ta pai ashi.

"Nagaland nung yimtenren tensa angatetsüla. Congress MLA ka danga mali saka Member of Parliament ka shimetba ya takok tulu ka liasü. Ruling sorkar ket nung Chief Minister ka lir saka opposition ket nung Member of Lok Sabha ka lir. Nagaland nung tayongzükba jenti ajuruaka Congress shia arudar" ta Christopher Tilak-ia ashi.

"2028 elections atema asalentong tejangja ka yanglutsüla aser lanur, tetsür aser sendaktepa alirtemi shilem agitsüla. BJP indang policy tem ya democracy aser lisopur temetentem atema lendong lir" ta Tilak-isa ashi.

Tanü Dimapur nung agiba sentong nung Retd. Additional Director of Rural Development Department, GoN Taliyanger-i Congress nung aden.

Pawan Hans teloki RCS UDAN asadanger

Dimapur, February 18, 2025 (TYO): February 18, 2025 nü Pawan Hans nungi teshimtet telok ka Kohima-i aruogo aser parnoki Regional Connectivity Scheme (RCS) UDAN kübok maparen asadangtsü.

Pawan Hans teloki district pungu-Tuensang, Mokochung, Zunheboto, Kohima, aser Phek nung infrastructure aser feasibility asadangtsü.

Iba scheme kübok mezüngbuba telemsa nung district pungu ya dena lir. RCS UDAN ya regional air connectivity tajungba akümtsü aser Nagaland nung meta talang pilar alirtem yarisü atema lir.

Tanü senden amendang Transport Secretary Robert Longchari-i terenlok mapatem aser tayongzükba balala indang

lemsatap.

District pungu nung infrastructure yangluogo saka senotsü temelaba den fencing o helipad upgrades amala maparen tilateri kar anünga lir. Maparen metenzükdang sorkari özüngren aser ali agiba onüktem repringshimtsü nüngdaker, ta Robert Longchari-i ashi.

Helicopter service ajanga district headquarters dang masü saka subdivisions ajangzüktsü. Iba ajanga medical emergencies aser subsidized transport nung teyari tulu angutsü. Nagaland nung gari lenmang tia majung lir anungji air connectivity-i tongti shilem agitsü, ta paisa metetdaktsü.

Pawan Hans-i Nagaland nung tang yanglua aliba helipads asadanger aser ano helipads talila yanglutsü sentong lir.

Centre sorkari Northeast renlokdaktsütsü meranger: Union MoS



Kohima, February 18, 2025 (TYO): Union Minister of State Kirti Vardhan Singh-i Mongulbarnü tang mezüng atema Nagaland semdangi aru aser idangji Centre-i Northeast renlokdaktsütsü mangdang aliba nenshia metetdaktsü.

Prime Minister Narendra Modi-i temulung agütsüba ama Centre sorkari Northeast renlokdaktsütsü meranger ta pai ashi.

Kirti Vardhan Singh ya MoS for Environment, Forest and Climate Change lir aser tang mezüng atema Northeast semdangi arua lir aser tanü pai Nagaland semdang.

Centre sorkar akümba sülen Northeast ajungkettsü atema inyaka arur aser onoki infrastructure tajungba akümtsüba nung temulung agütsür, ta pai ashi.

"Taküm Union Budget nung agriculture, small-scale industries, defense production, aser employment ajungkettsü enoka aliba atema tenüngsang agütsür. Iba budget ajanga India nungeri aginüba sayur aser 2047

tashi nung Bharat renloker alitsüba mangdang dena lir" ta MoS Singh-i ashi.

Northeast nung akhidang nungi infrastructure aser connectivity tsütsü tayongzükba jenti liasü ajistiaka Uddan scheme kübok maparen inyakba ajanga air connectivity tajungba kumogo. Ano rail stations tasentem yangluba den gari lenmangtem ulushir aser Centre-i maneni nüngdakba infrastructure tem agütsütsü, ta pai ashi.

Dimapur nung railway services nung train aika ajema akümba tebilemtsü atema ashidang "regional stations aser highways ulushiba ajanga train routes kar melenshitsüsa kumogo" ta Singh-i ashi.

Küm 100 ser tema tain Dimapur Railway Station nungi train kar agienba atema pai repringshimtsü ta nangzük.

Kohima nung airport tanabuba meyanglutetba atema olen ka ashidang "taküm budget nung airport tasen 50 yanglutsü benoka lir aser iba ya Northeast India nung temulung agütsür" ta Singh-isa metetdaktsü.

Protected Area Regime (PAR) ajanga Nagaland-i foreign tourists aruba nung tetsükdaktsü ajurur saka sorkari parnok asoshi special passes agütsütsü mapa inyakdar ta paisa ashi.

Northeast nung eco-tourism lenmang sadema lir aser sorkari connectivity tajungba kümdaktsütsü merangba ajanga homestays aser organic farms dena local businesses asoshi maongka tasentem bentsür arutsü, ta MoS Singh-isa ashi.

India renlokba nung Northeast-i tongti shilem agir aser linük renlokba nung tongti shilem agitsü atema Centre-i mapa inyaker, ta paisa shisem.

Centre-i Development of North East Region ta ser ministry balaka tenteta lir aser iba ministry ajanga state shia indang infrastructure aser development atema inyaka arur ta Singh-i nenshia metetdaktsü.

Tanü Union MoS Singh-i Naga Heritage Village Kisama semdang aser Party Head Office nung BJP Nagaland unit den Union Budget indang shisatokden ka agia liasü.

DNSU-i GMS Midland nungi Health Centre agentsü mapang züngzüktsür

Dimapur, February 18, 2025 (TYO): Dimapur Naga Students' Union (DNSU)-i Department of Health & Family Welfare nem anogo 7 nü tsünga Government Middle School (GMS) Midland nung takdang agia aliba toktsütsü mapang züngzüktsüogo.

GMS Midland nung özüng alema Health Centre ka lapoka lir aser DNSU iba ya agentsü takhangba agütsüogo.

Mongulbarnü GMS Midland nung DNSU-i lungkak aitba sentong ka ayongzüka agia liasü.

2011 küm kaketshirtem aser tesayurtem asoshi mebilemdangi GMS Midland classroom ka nung health centre ka amenok ta DNSU lennirtemi ashi.

School ka nung medical reju ka lapokba ya kaketshirtem atema majung aser bio-medical waste kong endoker memetet. Onoki aiben mepishiaka health

department-i school toktsür maor aser osang angazükba agi iba centre ya Urban Health and Wellness Centre ka akümtsü sentong lir, ta lennirtemi ashi.

Principal Director of School Education-i July aser October 2024 nung anaben tashi medical department dang school toktsür aotsü tetuyuba agütsü. Ajisüaka department-i tashi mangar aser health centre magiener ta DNSU-isa ashi.

Health aser education külemi yaritepa aoer saka iba ajanga school tiyongtsü nung hospital ka lapoktsüla ta mashir ta parnokisa ashi.

Iba lungkak aitba sentong ka DNSU kija masü saka Dimapur nung tawa presidential meeting ka amendang külemi lemtetba lir. Sorkari iba onük süoki ia bilemtsüla aser Chief Minister-i tebang ia iba ken o angatetteptsüla, ta Dimapur

Lotha Students Union (DLSU) president-i ashi.

DNSU-i tanü Additional Deputy Commissioner (ADC) Zakabo Rotokha ket nung ultimatum agütsü.

"Iba tebilemtsü onük ya tasen masü aser taoba nung district administration-i Midland colony council, health department aser education department den sendentem menogo" ta ADC Rotokha-i ashi.

Tawa tu district administration dangi department nungi shidi ka aru aser iba nung department ka aotsü atema ali agütsütsü shia liasü. Onoki iba atema inyakdar aser ozü revenue branch-i tesem ka bushia department dangi abentsü, ta paisa ashi.

District administration-i akokba tashi iba tebilemtsü loktettsü meranger, ta ADC Rotokha-isa shisem.

Nagaland Angh-i National Integration Tour tembangtsü



Nagaland Angh La Ganesan-i Kohima nung February 18, 2025 nü National Integration Tour tembangtsüba mapang tangokba noksa nung angur.

Dimapur, Tsüklai/February 18 (TYO): Kohima Garrison Assam Rifles nung February 18, 2025 nü National Integration Tour tembangba sentong Nagaland Angh La Ganesan-i moaja liasü.

Iba sentong nung jembidang, HQ IGAR North kübok 13 Assam Rifles ajanga ayongzükba National Integration Tour shibangba sentong nung shilem agitetba asoshi pelaba lemsatepa liasü.

Iba Tour ya February 4, 2025 nung tenzük aser February 18, 2025 nung tembanga liasü, kong Kohima nung aliba college balala nungi kaketshir 16 aser tesayur pezü lungjemer Mumbai, Pune aser Goa

semdanga liasü.

India ya tabu balala tebour ajungba, yimsü-yimbong balala aser sobaliba balala agi sünga lir aser iba linük nung senso ka ama asenoki dangar libaliru angatetsü tongtipang, ta pai ashi.

Iba tour ajanga nenok dang dangar den metettepba aser tajangshiba balala ajanga kati ka tali angatettepa, akumtsübotepa aser asen nübür tsüngta telungjem alitsü nüngdakba ajiteta alitsü südi ta amanger, ta Nagaland Angh-i ashi.

Item tajangshiba yagi asen tangatetba ulushiba kisüng masü saka asen linük asoshi tejak tenteta bilemtsü, ta pai ashi.

Assam Rifles temi national

integration temaba jenjangi ajungkettsü asoshi inyakba aser iba ama tour ayongzükba atema Angh-i pelaba lemsatep.

Lanurtem mulungjang nung telungjem tanüka adokdaksütsü asoshi inyakba atema tenüngsang agütsütsü langa lir. Assam Rifles temi mapang shia asen linük bendanga agütsür tenzükba sayur aser iba sentong ya kuli ka lir, ta ashi.

Angh-i tarutsü nung ano kaketshir aser tesayur tali iba sentong nung shilem agitsü ayongzük aser ibai tesem balala sema jajaba kisüng masü saka apular, tesendaktep yanglur aser linük telungjem adokdaksüba maparen ka lir, ta ashi.

Anakiyimsen nung Watershed Yatra Campaign agi

Dimapur, Tsüklai/February 18 (TYO): Department of Land Resources, Government of Nagaland ajanga Mokokchung district kübok Anakiyimsen yimda February 17, 2025 nü Watershed Yatra Campaign agia liasü.

Iba sentong tenzükba Anakiyimsen Village Council chairman ajanga pela agizükba o jembi aser District Project Officer, Land Resources Department, Sentinungla ajanga iba campaign nükjidong rateta ashi.

Iba sülen SDO (Civil) & Border Magistrate, Tuli, Nukshimatong, NCS ajanga Land and Water Conservation Pledge ketdangsüa agi aser

meimchir inyaksangshi agi tzü mopung nung kongshiba indang awareness agüja liasü.

Scientific yimya mamshi mijang atoba, packed mineral water bottles, polythene bags amala single use plastic amshiba, ayi aser mesen tepsetba chemical amshiba ajanga tzü, ali aser süngdong-lidong nung kongshiba indang pai rateta ashi.

Temelenshi ya pei jurila sasap nung tenzüksüla ta pai ashi aser yimda klar dang item oset tamajung aser yimya mamshitsü ayongzük.

Iba sentong nung Government Primary School kaketshir temi skit ka sayu, Anakiyimsen Baptist Church

Youth Department ajanga sobaliba tsüngsang ka agi shilem agi aser Jentiren Jamir, Femina Miss India Nagaland 2024 ajanga libajen wazüka ayutsü asoshi nübürtemi shilem tajung agitsü ayongzükba liasü.

Iba campaign nung shilem ka ama Self Help Groups (SHGs) temi inyaktetba osetsüset sayu aser yoka liasü.

Nikongdang sentong nung Shramdaan inyakyim dak rangloker Anakiyimsen Watershed Committee ajanga Watershed tesem anasa ali aser tzü wazüka ayutsü mapa inyaka liasü aser Watershed site dak sendakba oset DPO, Mokokchung ajanga lema agütsü.



latitude: 25.890021
longitude: 93.927844

Niuland district kübok Government High School Nito nung BetiBachaoBetiPadhao indang seminar ka February 18, 2025 nü agia liasü, kong 12th NAP (IR) Battalion indang Assistant Commandant, Alovika Swu, NPS shisalen sayur liasü. Kasa sentong nung EAC Niuland, Kelengunuo Solo-i kaketshir dang district nung Mission Shakti inyakyim indang rateta ashi.

Feb 20 nü AICC Nagaland In-charge, Christopher-i Mokokchung semdangtsü

Mokokchung, 18th FEB (TYO): 20th Feb, 2025 nü All India Congress Committee (AICC) Secretary In-charge for Nagaland, Christopher Tilak Mokokchung-i official tour arutsü sentong renema lir. Pa den Hon'ble MP & Nagaland Pradesh Congress Committee (NPCC) Tir, S. Supongmeren Jamir aser ano Kohima nungi NPCC ketdangsür densema arutsü, ta Mokokchung DCC Tir, Watimongba Aier aser Tongti Zülur (Admin), P. Aley nadi sangdong ka ajanga

metetdaksüo.

Centre aser state nungi party lenirtem den sensaksem mensem ka Feb 20, 2025 nüji, anepdang 10:00 ako nungi tenzükba Hotel Metsüben, Mokokchung nung akatsü. Anungji, iba mensem nung DMCC, DYU, NSUI, Kisan department, Seva Dal, DCC Advisor-tem, Mokokchung PCC Member-tem, ex. MLA-tem aser DCC ketdangsür ajak medema adentsü asoshi kasa sangdong nungsa metetdaksü.

Niuland nung ADIP & RVY assessment camp ayongzük



Dimapur, Tsüklai/February 18 (TYO): Niuland District Administration ajanga Health & Family Welfare Department, Social Welfare Department aser Artificial Limbs Manufacturing Corporation of India (ALIMCO) den lungjemer Assessment Camp ka Niuland Sardar kübok CHC Niuland nung February 18, 2025 nü ayongzükba liasü.

Iba Camp ya Assistance to the Person with Disability (ADIP) schemes aser

Rashtriya Vayoshree Yojana (RVY) kübok ayongzükba liasü.

Iba Assessment Camp nükjidong ya teintet rogotem aser matamabensar tem yaritsü nükjidong nung ayongzükba liasü. Iba camp sülen parnoki Tricycle, Wheelchair, Crunch, Walking stick aser Hearing aid amala angati agütsütsü, aser camp nung nisung 36 indang assessment agia liasü.

Iba camp ya EAC Niuland, Vitoka Yephthomi lenisüba kübok agia liasü.

NCSU ajungben senden ka amentsü

Dimapur, Tsüklai/February 18 (TYO): Nagaland Contractors' & Suppliers' Union (NCSU) Head Office Kohima Nagaland ajanga ajungben senden ka February 26, 2025 anüngdang 12:00 ako nungi tenzükba NCSU Conference Hall nung ayongzükba lir.

Iba senden nung PMGSY-III NPWD, Samagra Education, Tribal Affairs, PMAAGY,

Tourism Department nungi aruba RTI report tem indang jembitsü, ta NCSU sangdong ka ajanga ashi.

Anungji NCSU Executives, Action Committee, Advisors, Legal Cell, RTI Cell aser NCSU District Unit ketdangsür ajak iba senden nung adentsü metetdaksür, ta sangdong ajangasa ashi.

Chümoukedima DC-i NH-29 anasa inyakyim balala nokdang

Dimapur, Tsüklai/February 18 (TYO): National Highway 29 anasa aser RoW telungzük nung long atuba, ali aonba, ki o jen yangluba, khi atema süngjang-lijang aser aonsotsü ayoktsü stalls lapokba aser ali dak sendakba danga inyakyim balala inyakba osang District Administration ajanga angazükogo, ta Deputy Commissioner, Chümoukedima, Polan John, NCS ajanga sangdong ka nung ashi.

Item inyaksangshi yagi highway indang 'structural integrity' nung timtem tulu agütsütsü aser ali pongzük aoba, alinen aluba, highway nokdangba, ali agiloka aoba aser highway nung lendong balala ajurua nübürtem lendongi yoktsü.

Anungji tongtipang infrastructure wazüka ayutsü

aser senzüsemponger aser nübürtem takum kumzükba alitsü mechi nisung ajak, Village Councils aser stakeholders ajunga dang NH-29 anasa long atuba, alia tuba, khi atema süngjang-lijang aser aonsotsü ayokba stall amenokba amala inyaksangshi meinyaktsü metetdaksür, ta sangdong ajanga ashi.

NH-29 arishia amshitsü aser nisung ajunga lendong timtem nungi kumzükba ayutsü mechi nisung ajaki amalitep akatsü ajungshir. Iba dak tali osang metetner mesüra jangjaner tem iba Office den tongteprateptsü akok, ta DC Chümoukedima sangdong ajanga ashi.

NH-29 raksatsüsa inyaksangshiba putetra, ozüing agi melaba ama tapet mera agitsü, ta ashi.

India, Qatar na tesendaktep yanglushiogo



PM aser Qatar Amir, Sheikh Tamim Bin Hamad AL Thani na New Delhi kübok Hyderabad House nung India aser Qatar na MoUs melentepba mapang tangokba noksa nung angur.

New Delhi, Tsüklai/February 18 (Agencies): Ato Kilonser Narendra Modi aser Qatari Amir, Sheikh Tamim bin Hamad Al-Thani nati linük ana shishilemba aser energy nung tesendaktep akangshitsü asoshi rangloker inyakba mapang Mongolbarnü India aser Qatar na tesendaktep strategic partnership jenjangi ajungkettsüogo.

Tir Droupadi Murmu-i Rashtrapati Bhavan nung Sheikh Tamim agizükba sülen mapang tatsüka lir lenir ana ya ajurutepa linük ana tsüngda bilateral tesendaktep lepa reprangshiogo. Amir Hombarnü New Delhi tonga aruba sülen Modi-i pa agizüka liasü aser iba ajanga linük ana tesendaktep koda tongtimbang aji sayur.

Tesendaktep strategic

partnership jenjangi ajungketba dang masü, linük ana yagi saru anaben agiba nungi jenboa alitsü income dak sendakba nung saru atema fiscal evasion nokdangtsü atema tenangzüktepba yanglushiba nung sign sütepogo.

Modi aser Sheikh Tamim na Hyderabad House nung senden amenba mapang shishilemba, energy, investments, innovation, technology, food security, sobaliba aser nüburtem tesendaktep dak sendakba nung sensaksem kaogo, ta external affairs ministry otongdar Randhir Jaiswal-i X ajanga metetdaksü.

Lenir anapronglai regional aser global ken o balala dak sendakba nung pei tebilemba lemsatapa liasü, ta Jaiswal-i ashi. Israel aser Hamas na

ceasefire benoktsü atema inyakyim nung Qatar-i tongtimbang shilem agiba indanga sensaksema liasü, ta angateter.

Mongolbarnüsa commerce minister Piyush Goyal aser Qatari commerce minister Sheikh Faisal bin Thani bin Faisal Al Thani na India-Qatar Business Forum nung shilem agi, koba linük ana tsüngda shishilemba nung tesendaktep tajungba küma yanglushitsü atema Confederation of Indian Industry-i ayongzüka liasü.

Küm ter shi nung tang mezüngbuba Sheikh Tamim-i India semdanger aser iba ajanga tawa linük ana tsüngda tesendaktep tajungba akümba sayur, koba küm ana tejakdang Qatar nung Indian Navy ti tepuokdak ayuba ajanga raksar liasü.

Amit Shah-i J&K nung ozüng tasen benokba asadang

New Delhi, Tsüklai/February 18 (Agencies): Union Home Minister Amit Shah-i Mongolbarnü Chief Minister Omar Abdullah aser Lieutenant Governor Manoj Sinha na matsüngdang Jammu and Kashmir nung criminal law tasen benoka inyaksangshiba

jenjang asadangogo. Jammu and Kashmir ya 2019 küm Jammu and Kashmir, aser Ladakh ta union territories ana küma lemdangtsüba sülen iba UT nung temzüng ozüng ya Centre sorkari indang indanga achaayangaka Abdullah iba senden nung dena liasü.



February 18 nü New Delhi nung India Meteorological Department küm 150 ajungba nüngdem nung Delhi Street Art den longjemer India Meteorological Department-i ayongzüka "Mausam Bhawan Special Art Showcase" Lapokba sentong nung Minister of State for Science and Technology (Independent charge), Earth Science (Independent charge), Prime minister's office, Personal, Public Grievances & Pension, Atomic Energy and Space, Dr. Jitendra Singh-i shilem agiba noksa nung angur.

Abdullah aser Sinha na dak alia, Centre sorkar aser Jammu and Kashmir sorkar ketdangsür tongtimbangtemi iba senden nung shilem agia liasü, ta ketdangsürtemi metetdaksü.

Bharatiya Nyaya Sanhita, Bharatiya Nagarik Suraksha Sanhita aser Bharatiya Sakshya Adhiniyam nungeri colonial era Indian Penal Code, Code of Criminal Procedure aser Indian Evidence Act of 1872 melenaliasü.

Ozüng tasentem ya taoba küm July 1 nü nungi tenzüka inyaksangshia arudar.

Home minister-isa, Uttar Pradesh, Haryana, Uttarakhand, Madhya Pradesh aser Gujarat densema state balala nung criminal laws tasentem benoka inyaksangshiba jenjang asadanga arudar.

Senden nung adenba sülen Jammu and Kashmir chief minister Omar Abdullah-i, Union Territory nung criminal law tasen asem ya tilateri ken o kar aliba dak alia kanga takok ngua benoka inyaksangshidar aser tetsükdaksütem ya yakta bentettsü, ta ashi.

Maha Kumbh ya 'Mrityu Kumbh-i melen: Mamata

Kolkata, Tsüklai/February 18 (Agencies): West Bengal chief minister Mamata Banerjee-i Mongolbarnü, la Bangladesh nunger fundamentalists tem den sendaktepa lir ta ashiba kuli agütsütsü Bharatiya Janata Party (BJP) jazükogo aser BJP-i kuli bener arutetra lai mapa toktsütsü ta shiogo.

West Bengal Assembly nung o jembiba mapang Mamata Banerjee-isa, UP kübok Prayagraj nung tang agia aliba Maha Kumbh Mela shitak achaayang masüba atema Centre sorkar aser BJP-i aniba Uttar Pradesh sorkar aitsüogo.

"Maha Kumbh ya 'Mrityu Kumbh'" agi melenogo, ta Mamata Banerjee-i Mongolbarnü Bengal Assembly nung ashi.

Mamata Banerjee-isa, la Bangladesh nunger fundamentalists tem den sendaktepa lir ta MLA temi aitsüba atema Ato Kilonser Narendra Modi nem tashishiba ka agütsütsü, ta ashi.

BJP-i yimden yimsüsüba nung parnok ajangzüksü atema tamangba yimsü amshir, ta CM

Mamata-i ashiba den, o jembitsü atema nüjiso agüja aliba ajanga BJP MLA tem nem tesempatep prokshitsü aser nüburtem lemdangtsütsü asoshi kecha temeden magütsür, ta shisem.

West Bengal nung Opposition lenir Suwendu Adhikari-i Honibarnü, state kübok tesem kar nung linük anema inyaksangshiba tali kümogo ta ashi aser iba ya chief minister Mamata Banerjee dak tai tonglokja liasü.

"Taoba ita 2-3 tsüngda Bangladesh nunger, Rohingya nunger aser extremist tem aika Assam Police aser Jammu and Kashmir Police-i puogo. Assembly constituencies 50 nungi 55 aser police stations 30 nungi 35 nung demography melenshiogo aser iba ya Mamata Banerjee khuret lit. Lai Bengal nung police minister (Home Minister) ama tamakok nguogo," ta pai ashi.

State nung BJP lenirtemi Mamata Banerjee aija arudar aser ashiba agi lai aniba sorkari ozüng alema aruba Bangladesh nunger aser Rohingya nungertem state nung alitsü asoshi temelaba agütsür.

SC-i Michel nem bail agütsüogo



New Delhi, Tsüklai/February 18 (Agencies): Supreme Court-i Mongolbarnü Agusta Westland chopper ochi mashi ken o dak sendakba nung Christian Michel nem bail agütsüogo.

Christian Michel James ya sen crore 3,600 alang AgustaWestland VVIP chopper ochi mashi ken o nung middleman ka liasü, aser pa Central Bureau of Investigation (CBI) aser the Enforcement Directorate (ED) nati ken o benokba sülen küm trok custody nung yuogo.

Justices Vikram Nath aser Sandeep Mehta nati, James ya custody nung taoba küm trok yuogo, saka ken o maneni bushisüngdangdar, ta ashi. SC-i ashiba agi, pa bail nung chioktsü, saka trial court-i latettsüba terms aser conditions dak ajemdaker chioktsü.

Ibe ken o ya chopper design and manufacturing company AgustaWestland nungi VVIP

helicopters 12 alizükba dak sendaka lir. James ya Dubai nungi anir aru aser ED-i 2018 küm December 22 nü apu aser 2019 küm January 5 nü nungi judicial custody nung yua liasü.

CBI-i parnok indang chargesheet nung ashiba agi, euro million 55.262 alang VVIP choppers India sorkar nem agütsütsü asoshi February 8, 2010 nü tenangzüktepba yangluba ajanga euro million 398.21 takoksa ajuruogo.

ED-i 2016 küm June ita James anema benokba chargesheet nung ashiba agi, James nem AgustaWestland-i euro million 30 agüja liasü. Tanga middlemen ana ya Guido Haschke aser Carlo Gerosa na liasü.

James ya British nunger arms dealer ka lir, shibai Indian Air Force (IAF) ketdangsür tongtitem aser iba mapang UPA sorkar atsü arua AW101 choppers 12 alidaktsütsü asoshi AgustaWestland nem teyari agüja liasü.



TIR YIMYIM YIMOBILEM (EDITORIAL)

DIMAPUR RASEMNÜ, FEBRUARY (TSÜKLAI) 19, 2025

Stadium semdangba atema pelar

Tangarbo mapang shitak nung lanurtem asoshi kaketreju aser asayadak tesem tajung mesemteta renemtsüba asoshi pelar saka Dimapur purbo Multi-Disciplinary Sports Complex (MDSC) yanglu tenzüker küm metsübuba nunga merenemtetba kuli bushia aruba asoshi pelar. Mapa renemtsüba asoshi pelaba aser mapa merenemtetba kuli bushii aruba atema pelaba na tetsüngdaji talangka lir, saka mapa merenemyonga kiburi mamadoki bushia aruba nungji teimla kabo agütsür, iba jagi pelar. Aji oda, yakanü Nagaland Legislative Assembly Committee on Government Assurance nung mendenbuba K. Azo Nienü-i anir parnok züngsemtemi Dimapur nung 2006 küm crore 50 agi tenzükbba Multi Disciplinary Sports Complex tang tashi merenemtetba kuli bushisüngdanga aruba kisüng jagi Dimapur nung alirtem mulungsüngzük kabo ngur alitsü, kechiyong iba Sports Complex kiburi iba tesem aser mapa ya tamabo mamai liasü ta mapa agi sayur. Tanga lima nung asünungbo, jokorla 2006 küm yanglu tenzükbba stadium nungji 2006 küm asortem asaya tenzüker tangbo joko alimai metettsüsa asayar tajung adoker lila, ajisüaka iba stadium yanglutsü tenzükdang asortem joko graduate asür aser kibong aküm meshir, saka tang tashi mapa noklang shilem nung shilem 25 tashia merenemtet ajokshir anenadokbaji government kija tamakok masü saka asenok nübortem ajak tamakok asütsü. Tanga lima nung government-i nübortem asoshi terenlok mapatem inyakba ajak junga inyakba dang masü saka mapang shitak nung renemtetbaji yimten yimsüsürtem aser contractor-temi pei lima aser nübortem meima ochishia inyakba kisüng agi masü saka nübortemia kibur kümtet-kümteta government nung alirtemi aser contractor-temi akümtsübuttsüsa wainshin meteta aliba agi mapa ajak shitak inyakteter, anungji inyaktertema tenüng tajung angur aser nübortema ajangzüker. Ajisüaka, asen lima nungbo government-i terenlok mapa inyakbaji government nung alirtem agitsü asoshi inyaker amai nübortemi bilemer, anungji nübortemi merepranger. Aji oda, nübortem asoshi terenlok mapatem inyaktsübaji mashimashi inyaktsüyonga kecha masü, inyaktur yutsüyonga kecha masü aser meinyak ser sen agizüka achiyonga tebushir mali ta asen lima nung alir asenok nübortem ya kenyongi balaka, kümli ajung asü (?) mesüra tamachi asü (?) mesüra kari shisaramatsü mozü chidaktsür pezübelemdaktsüar memetet, nüchi sensosangertem aliba limabo memesük, sen agi sen maja endoker saka nübortem asoshi alijak nung teinyaktetbabo maka, yimtena aser lokti tenteta mali amato yimtok kuma odagi. Talisa, Dimapur yabo Nagaland nung alir ajak meyong lir, kechiyong tangar yimtittem mesüka shishilembaba mapatem terara inyakbaji Dimapur ya dang lir. Aji oda, Nagaland ajak meyong tayimtsü aser train anendak aser apusodak Dimapur nung dang lir. Ajisüaka, item tayimtsü aser train anendak tesemtemjia tangar bendangertemibo Nagaland nungbo government malia na aser nübortemia pei yimti aser pei lima topur junga ayutsü mebilemer na (?) ta asüngdangtsüsaba tia ka nung lir. Atangji, tawa Dimapur nung town hall tila kabo sen crore 19 endoka yanglushiogo. Iba dakji alaka Dimapur nungbo yimten yimsüsür-a kata adoka mali ama, Dimapur ajungtsü asoshi jembibabo assembly nunga mangashir aser yimti nunga inyakba mong mereprangteter. Iba ama tia ka nung, mapang talangka lir tetsü-teboui pei semchirsemnur bushia aru ama, stadium ka yanglu tenzüker küm metsü buba nung Nagaland Legislative Assembly nungi yimsüsürtem aruba jagi Kohima nung alirtemi Dimapur nung 2006 küm MDSC tenzükbba tamabo mamai lir ta meteter. Iba jagi Dimapur nung alirtembo tepelashi aser asüngbo amadoktsüa akok. Ajisüaka, Nagaland government nung alirtemi mamadoki iba asayaba tesem ya yanglu tenzüker küm 25 bosa majungdang renemtetra, ibaibo Dimapur asoshi masü saka Nagaland asoshi tagidak akaba nümadangtsü tesem ka asütsü. Mapang shitak nung merenemtetyonga, shin o nung ashi ama, junga renemtetra ajak tajung asütsü.

OLEMSABANG

OSANGKAKET AJANGA NÜBUR TAGINUBA METETER

~ L. Kika Pongener.

Tanü putu nung osangtsüsang tongtepratep (Social Media) balala ajanga, alima kinuk pezüsulen tang kechi ataloker itemji second-minute tsüngda nung alima ajunga sunga meteta-adoker. Anungji 'Social Media' yagi alima ya kanga-sa tilaka oda yimtsüng ka amai dang kümdaktsüogo. Putu aika asen lima nung osangkaket makaba ajanga asenok tenuk tapok amai lia aruogo. Ajisuaka, tanübo anogo shia osangtsüsang azüngtsüsa osangkaket aika akaba ya kanga pelatsüla. Talisa, asen Ao oshi nung anogo shia adokba osangkaket Ao Milen aser Tir Yimyim akaba ya asen Ao kin asoshi senti-rongsen amai bilemstüla. Ano aji dang masü, English oshi nung anogo shia adokba osangkaket, ni aibelener ka mesura asen Aotsür Aor-i adokba.... Nagaland Post, Mokochung Times, Morung Express, ano meshisemba kar lira....item ajak ya Aor senmang senti-rongsen asütsü. Anungji Aotsür Aor ajaki item osangkaket ya maneni tajungba terenlokba nung adoktsü asoshi nungita yaritsüla. Ita ka-ana shi suia-ogo asen Aotsür Aor-i adokba osangkaket "Nagaland Page" anena-adokba osang ngua kanga sasaa bilemogo.

Ano asen Aotsür Aor ajaki kanga pelatsüba aser tenungsang agutsütsüba kaji....Ao milen aser Tir Yimyim osangkaket anaprongla nung nuburtemi pei tebilemba, tangatetba aser taginubatem asen oshi agi, asen Aor yimden, arogo, mungdang aser loktiliba ajunga melenshitsü aser yanglushitsü asoshi ajongshitepa zülutettsüsa olemsadak sabang/tawa wazüka yutsüba ya Aotsür Aor ajak atema maongka aser temoatsü tulu ta züngshidi. Iba sabang nung asenoki mapang shia pei tangatetba, pei tebilemba, aser asen lima ajungtsü aser yanglutsü asoshi tajongshi o lemsatepa ocet zülutsüla. Iba sabang ya asenoki asen tetsü oshi wazüka ayudak sabang ka, asenok shisatsü anetdak sabang ka, asen nubur mulongjang angudak sabang ka, aser nubur taginuba ola angashidak sabang ka amai amshidi. Iba sabang ya asenok o asenok na kati ka amokmerentepba sabang ka mekümdaktsüli.

Akhidang anogo shia adokba osangkaket maliba mapang, asen yimden arogo mungdang aser loktiliba ajunga nukpoker lenniba ajok maka amai lia aruogo. Koba telok nung sudir suaka, lennirtemi nubur taginuba kechi (?) Tang nubur tangatetba aser taginubaji kechi (?) Tang nubur kong nokdaka lir (?)ta nuburtem mulongjang metettsübaji kanga-sa tongtipang. Lennir ka atema nubur taginuba memeteti lokti anitsübaji kangapo temela masü. Talisa, yimsusur atema nubur taginuba aser nubur kolen tejak shia lir (?) aji metettsü kanga-sa tongtipang lir. Aji oda, yimsusuri nubur mulongjang memeteti pei angatetba/metetba shisatsü kisung agi anira, mapang kar nungpo"Poru long nung chitak ama chitaka ayutsü".... Aji oda, lennirtemi nubur ola anga-a lokti anira, loktiji takok ngua tejakleni aotsü. Atangji, asen oshi agi azüngtsüsa/zülutsüsa olemsadak sabang, nubur nem tawa yutsüba ajanga nubur mulongjang angur aser nubur taginuba meteter. Anungji olemsadak sabang ya nubur tanüdagtsü (Aina) amai bilema nubur ajungai pei tebilemba lemsatepa ocet zülutsü ajongshir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pope Francis mozü kidang munga lir



Vatican City, Tsüklai/February 18 (Agencies): Pope Francis ya "complex clinical situation" ka anepalutar aser mozüki nung mapang kobika nüngdakdir amungtsü, ta Vatican ajanga ashi.

Arishi küm 88 tain Pope Francis ya bronchitis (tepokpok nung timtem ka) tendanga anepalutsü atema Hokulbarnü Rome indang Gemelli mozü kidangi anir ao.

Hombarnü Vatican ajanga putir dak tangola sashiba tezü nung "polymicrobial infection" lir aser pa temang anepaluba

yimya melenshitsü nüngdaker, ta ashi.

Ano mapang tatsüka lir sangdong ka nung Pope ya nüngdakba ama temang anepalutar aser talitapong masü aser temang metaba mali ta ashi. Hombarnü pa mozü kidang mapa kar inyak aser kaket azüng.

"Pope Francis dang tesem balala nungi nüburtemi sarasademja osang yokba asoshi kanga pela lir," ta sangdong ajanga ashi.

"Talisa tang mozüki nung munga alirtemi pa dang temeim

sayua noksa yanglur yokba aser sarasademtsüba ajanga pa mulungjang nung kongshi. Pai parnok asoshi sarasademtsür aser parnok dang pa atema sarasademjang ta ashi."

Taoba hopta mozü kidangi maodang Pope dak anogo ishika bronchitis symptoms liasü aser sentong balala nung pai renemba azüngtsü ketdangsür shimteta liasü.

Vatican odongtar Matteo Bruni-ia Hombarnü osangbener dang putir tangatetba tajung nung lir ta shia liasü.

"Tanü tashi tendangba ajunga nung 'complex clinical picture' sayur aser mozüki nung mapang peria amungtsü nüngdaker," ta sangdong tatsüka agütsü.

Putiri hopta shia nüburtem den Bodhbarnü ajurutepa aruba tan hopta atema thiogo, ta sangdong ajangasa ashi.

Hopta tatemlen Vatican ajanga Pope temang tali tamajungba mesüi lir aser taneptsü angutsü asoshi anisüngzüksü shiogo, ta shia liasü.

Hokulbar aser Honibar anogotem pai Gaza nung Father Gabriel Romanelli-i anir aliba Holy Family Parish den video ajanga jembia liasü.

"Onoki pa ola angashiogo. Pa kanga anibelemer lir. Paia 'Ni temang anepalutsüla lir,' ta shiogo. Saka pa ola tejangja angashir aser onoki jembiba züngzünga anga," ta Fr Romanelli-i Vatican News dang ashi.

Deobarnü Fr Romanelli-i shiba agi, Pope nungi text message ang ka aru aser yangji pa asoshi sarasademtsüba pelar ta shia liasü.

Pope ya hopta shia Deobarnü St Peter's Square nung sarasadem sentong magiteti liasü mesüra Catholic Church indang Jubilee Year nüngtem nung artists asoshi pai anir balaka sarasadem mesüteri liasü.

Pa anisüngzüka taneptsü angutsü meranga taoba hopta Vatican nung par kidang ang senden mena liasü.

St Peter's Basilica kimalen nüburtemi Pope asoshi sarasademja arua liasü.

Australia nunger England nung arua alir Bernard-i par tanurtem den külemi Rome semdangba mapang, "Onoki Pope asoshi sarasademtsütsü," ta ashi.

"Parnok tain kumer ang iba mapa ya inyaker. Anungji parnok teti temang nung timtem ajurur," ta pai osangbener dang

ashi.

Armando-i Pope asoshi anogoshi sarasademtsür ta ashi.

Rome nung alir Armando-i Pope ya nisung tajung ka lir aser asenok ajak asoshi ajungmesor ka lir, ta ashi.

Pope Francis ya Roman Catholic Church indang lenir ka ama küm 12 inyaka arudang mozüki nung ishiben mungogo aser pa arishi tepiyong temang nung timtem balala agi menepa aru aser pa arishi küm 21 asüdang pa indang tepokpok ka nungi shilem ka indoka liasü.

March 2023 nung pa bronchitis mechi mozüki nung aonung asem mejang aser kasa küm June ita 'abdominal hernia' yanglushitsü asoshi operation ghonda asem agia liasü.

Ano pa shirangba ajanga 2023 nung COP28 climate summit atema United Arab Emirates-i aotsü aliba athi.

Taoba küm December ita Catholic cardinal tasen 21 anioktsü asoshi St Peter's Basilica nung sentong ka agidang pa takummechi nung zübu tuluka liasü, koba pa alang dang yiruba lir ta Vatican-i shia liasü.

Ano January ita pa alanga teka achichi yirua liasü.

Madhya Pradesh nung Catholic nun ka anema ken o benoka lir

Indore, Tsüklai/February 18 (Agencies): Madhya Pradesh state nung aliba police temi Catholic nun ka aser dangar nisung asem-i state indang anit-conversion law nung aibelenba atema ken o ka February 16, 2025 nü benokogo.

Holy Spirit Sister Sheela Savari Muthu aser la den külem tenzüker tetsür ana aser tebur kati kidang yaritepba tanurtem asoshi sentong ka ayongzükba sülen Indore city police ajanga ken o ya benok.

Right-wing Hindu activists kari akhangba nung ajemdaker ken o ya benok. Public garden ka nung health and hygiene awareness camp ka nung adenba tanur 120 shi tamangba yimsü melendaktsütsü merang ta tai tonglokja Hindu nunger temi Khristanpur nem temerenshi agütsüdaktsüner.

Police temi par pezü ya ghonda toku jungnua pua ayu aser Hindu activists 600 shi adenshia parnok mechioktsü aser missionary mapa anema yimiyim ayima lia aonung toku ako nung chiok.

Hindu nunger telok ka yagi tanurtem aser tetsürtem police station-i anir arua nun anema kuli agütsüdaktsütsü merang saka takok mangu. Parnoki police station telung nung nun den külem

tenzüker tetsür dang la anema kulu agütsüdaktsünü, saka yangjia takok mangu, ta iba tatalokba meteta alirtemi UCA News dang ashi.

"Tanur temia mesüra tetsür temia kuli magütsü la anema kuli magütsü, saka Hindu activists tem makok police temi ken o zülüok," ta ashi.

Sister Muthu-ia ibai khenyongi taila ken o lir ta ashi.

"Kidang yariteper indang tanurtem asoshi onoki health aser hygiene camp ka ayongzük. Yangi aliba sorkar ketdangsür nungi temelaba agir iba sentong ya open public garden nung ayongzük," ta lai UCA News dang February 17, 2025 nü ashi.

"Sentong tenzüker ghonda ishika tsüngta nisungtem adenshia missionary aser tamangba yimsü melendaktsüba anema yimiyim ayim tenzük. Anungji onoki police dang teyari meshi," ta lai ashi.

"Police temi onok police station-i anir ao. Onoki Hindu nunger telok anema ken o benoknua liasü, saka parnoki aji agizüktsü memulung aser onok anema ang ken o benok," ta nun-i ashi.

Bushisüngdangba telok nung police ketdangsür kati UCA News dang February 17 nü, "Tai tonglokja alir ya maneni asüngdangyatsü atema jaoktsü," ta ashi saka

osang tejangja mashi.

Indore indang Bishop Thomas Mathew Kuttimackal-i tia maka Khristanpur tanen makai merenshir ta ashi.

"Ibai menüngdakba nung amokmerenba lir, kechiaser parnok ya sensakertem yaritsü meranga liasü," ta Kuttimacakal-ia UCA News dang Hombarnü ashi.

"Tamangba yimsü melendaktsü ta tiazü nung tai tongloktsür yagia sensaksertem dangar ama alitsü temeden agiener ta meteta lir," ta bishop-i ashi.

"Khristanpur aser parnoki state nung nübur asoshi mapa tajung inyakba nung tenük yoktsü asoshi anti-conversion law mashi lenmang nung amshir," ta pai ashi.

India nung anti-conversion law amshiba state 11 rongnung Madhya Pradesh ya ka lir, aser iba ozüng yagi tamangba yimsü melendaktsüba kuli tejangja ngutetra küm ter tashi tepuokdak ayutsü melar.

Hindu yimsü bhukumba Bharatiya Janata Party-i iba state nung yimsü asür. BJP sorkar aruba sülen Khristanpur anema mapa tamajung inyakba tali kumogo, aser police temia yaria India ya Hindu lima kumdaktsütsü meranger, ta Khristan lenirtemi ashir.

ANOGO ABEN TSÜNGREM DEN

TSÜNGREM ANGATETBA TEMOATSÜ

Timtem aketba rongsen tulu akaba dang nungi, Kibuba tsübuba den tera akaba tajungba. ~ **Apijemtsü 15:16**

Alima nung rongsen tapu aika lir, tatishitsü agi, chirnur kimong-lumong, Gari, ki tajung, sen, osettsüset ano aika Item rongsentem ya kibongtem kin kidong aser lokt balala asoshi rizünga yua lir aser ayur. Saka item rongsentem ya koba lenmang nungi anguba, ochishia ketdang asür asü masü? Item rongsen ajanga timtem. shisabulu, mangatetep, mepelatep dang adokra tai mena-a lendong tashi ataloktsü ana nung dang lir. T. Kunem 8:18 nung ashir, Nai Kibuba ne Tsüngrem bilemtettsüla kechiaser ne nem rongsen angutsü ain agütsübaji Pa lir.

Tsüngremi asen nüngdak meteta aser ngua dang lir. Saka meimchiri merumerua tali tapung arishidang aseni asen sasa timtem aketba rongsen bendener. Tsüngremi ajak meteta dang alinungji tim masüba lenmang nungi bener aruba nungji timtem-ang bendenloker. Kodang asenoki Tsüngrem akhüm tsübudir ochishia inyaktsü aser bendentsü, tera dang süaka Tsüngremi ano tali dang moaja anitsü aser iba nung pela-a alitsü.

Apijemtsü 13:11 nung ashir, Ajongben anguba rongsenji ajema akümtsü; saka züsenba agi terara shibai bendendir. pa züintsü.

AO OSHI ANGAZÜKDAK:**TANÜ ANGAZÜKTSÜBA OJANG****Tejentokba**

(n) lokti aser kin kidong nungi endokba (excommunication)

* Tejentokba nisungi yimten dang tatok meshi.

Tejep

(n) tilala aika agi ka akümba temang (bunch)

* Ozü lu nungi somomo tejep ter bener adok.



Tir Yimyim

OLONG PAITEP # 7068

1						2				3
								4		
5		6				7				
8										9
								10		
				11		12				
		13								
14						15				
				16						

TIPLÉN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7067 TELANGZÜBA**TIPLÉN :**

1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kioktsü, 17. Itsük,
18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
5. Mitsüktsü, 6. Azübenshi, 8. Lah,
9. Jangkok, 12. Akok, 14. Nashi,
16. Sür.

NAI-A YA METETTER MA

Uganda nunger Jacob Kiplimo-i half-marathon nung otsü tassen ka yanglutetogo. February 16, 2025 nü Barcelona nung World Athletics Gold Label road race nung arishi küm 24 tain Kiplimo-i minute 56 ser second 42 nung half-marathon asemteta world record yanglua liasü.

Kiplimo ya anaben tashi world cross-country champion liasü.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Arunachal Pradesh nung Café Tuting Heights lapokogo

Dibrugarh, February 18, 2025

(Agencies): Arunachal Pradesh nung tang mezüng atema Café Tuting Heights lapokogo aser iba

ya arrtsülen aliba yimtsüng ajungkettsü atema lir.

Tuting yimtsüng nung loktii shilem agitsü, tetsür tashi

itdaksütsü aser rongsenketzüng jenjang renloktsü atema iba café lapoktsüogo.

Indian Army aser yimdaklirtem amalitepa inyakba ajanga iba café lapok. Iba café nung chiyungtsü ayokba dang masü saka mapa inyaksü maongka angur aser rongsenketzüng jenjang tajungba akümba den tourism ajungketer.

Iba café lapokba nung tongti mapa kaji tetsür tashi itdaksüba lir kechiyong tetsür entrepreneurs-i iba café ketdangsüa aotsü.

Pamoki meranga inyakba atema Certificates of Excellence agütsüogo.

Assam nung state-wide forest soil health cards sayaogo

Guwahati, February 18, 2025

(Agencies): Indian Council of Forestry Research and Education (ICFRE)-Rain Forest Research Institute (RFRI), Jorhat-i Assam Forest Department den külemi Forest Soil Health Cards (FSHC) sayaogo.

Assam PCCF & HoFF Sandeep Kumar-i territorial forest divisions 33 atema Health Cards sayatsüogo.

Iba sentong nung ICFRE-RFRI, Jorhat Director Dr. Nitin Kulkarni, Scientist-D & Principal

Investigator of the All India Coordinated Research Project on Preparation of Forest Soil Health Cards Dinesh K. Meena aser tongti ketdangsürtem aden.

Assam nung forest soil health atema scientific data maliba ajanga FSHC-i soil fertility atema teinyaksütem sayutsü.

ICFRE-RFRI, Jorhat-i Northeast India nung FSHC development maparen len ania inyaker. India-i Paris nung 2015 UNFCCC conference mapang nangzükba ama 2030 tashi nung

afforestation ajanga 2.5-3 billion tonnes additional carbon sink adokdaksütsü meranger.

Ministry of Agriculture-i Soil Health Card Scheme tenzüka liasü saka iba nung agricultural soils dak alaka forest soils maden.

Iba atema Ministry of Environment, Forest, and Climate Change-i CAMPA ajanga mapa tenzü.

Iba mapatong ya linük nung forest divisions 788 nung FSHCs renlok daksütsü aser soil fertility parameters 12 asadangsü atema lir.

Cachar district nung Indo-Bangla arrtsü anasa curfew benok

Guwahati, February 18, 2025

(Agencies): Assam kübok Cachar district administration-i India-Bangladesh arrtsü nung aonung curfew tenzüko.

Telungpurtem senzusenbongba aser nashi o osettem shibelenba noktangsü atema curfew benok.

India-Bangladesh arrtsülen tensa süngjema ayutsü aser ozüng alema inyaksangshiba azüoktsü atema tenokdangba agütsür ta Cachar District Magistrate Mridul Yadav-i ashi.

BNSS nung Section 163 kübok tenokdangba agütsüba nung telungpurtem

senzüsenbongba ajanga timtem agütsür aser ozüng alema osettsüset aser nashitem shibelener, ta shia lir.

Cachar district nung India-Bangladesh arrtsülen nikongdang nungi anepong tashi kilometer ka telongtet nung senzusenbongba noktanger ta district magistrate-i ashi.

GOVERNMENT OF NAGALAND
DIRECTORATE OF A.H & VETERINARY SERVICES
NAGALAND :: KOHIMA

NO.VET/EST-3/LEGAL/1/2024-25/

Dt. Kohima the Feb, 2025.

ADVERTISEMENT

In pursuance to the Hon'ble Gauhati High Court, Kohima Bench Judgement and Order dated 6.12.2024 W.P (C) No. 112/2020 and W.P (C) No. 25/2023, applications are hereby invited for filling up 2 (Two) post of Grade - 1V under the Department of A.H & Veterinary Services, from Indigenous inhabitants of Wokha and Tuensang.

Sl. No.	Name of the post	Vacancy	Pay Matrix
1.	MTS	VHC, Lotsu	Level-1
2.	Bull Attendant	VHC, Chare	Level- 2

Terms & conditions

1. Educational Qualification Certificate.
2. Age limit 18 years & Maximum 37 years as on 28th Feb' 2025 as per P & AR OM NO.AR/GEN-6/7/2024/A/ 601 Dated Kohima, the 15th Oct' 2024.
3. Candidate wanting to apply can submit self typed application, Birth Certificate, Aadhar, 2 Nos of recent passport photos and submit it to the Directorate of A.H & Veterinary Services, Kohima on or before 05/03/25. No applications shall be entertained beyond the last date of submission.
4. Schedule Tribe and Indigenous inhabitant certificate are mandatory.
5. Incomplete documents shall be summarily rejected.
6. Admit card shall be issued on 6th & 7th Mar'2025 along with interview date and time.

Sd/- (DR. ACHILA AO)

DIRECTOR

A.H. & VETERINARY SERVICES.
NAGALAND : KOHIMA.

GOVERNMENT OF NAGALAND
DIRECTORATE OF SCHOOL EDUCATION
NAGALAND : KOHIMA

NO. ED/EST/B-1/2019

Kohima, dated the Feb 2025

NOTIFICATION

In pursuance of Advertisement No. ED/EST/B-1/2019 dated 11th November 2024 and approval of the Government vide letter No. DSE/MISC/12-128/Recruit/2020/723 dated 14th February 2025 and on the basis of marks secured by candidates in the Written Test and Driving Test held on 05.02.2025 & 07.02.2025 respectively, the following candidates bearing the Roll Numbers (in ascending order) are hereby shortlisted to appear for the Oral Interview for final selection to the post of Drivers, which is scheduled to be held in the Directorate of School Education, Kohima on 20th February 2025 from 11 AM onwards.

Selected candidates may download the result from the Department's Online Service Portal <https://education.nagaland.gov.in> or Office Notice Board

Sd/-

(THAVASEELAN K) IAS
Principal Director.

Israel-i Lebanon nung sepai kar anizüker aor

Beirut, Tsükali/February 18 (Agencies): Ceasefire atema tenangzüktepba kübok sepaitem anientsü asoshi anogo atakzüka aliba süia aoba mapang Israel-i south-ern Lebanon nungi parnok sepaitem aniendar.

Mongulbar anepdang agi anogo anabuba atonga Israelmitkartem Lebanon nungi atsüginginogo.

Ajisüaka Israel-i ashiba agi, parnok tongtipang tesem pongu nungibo mainshitsü aser ano rara tenzüksü atema renema lir ta metetdaksüogo.

Tenangzüktepba kübok Israel nunger sepaitem ainshiba mapang Lebanon army linük south leni yoktsü nangzükteper lir, aser yamaji parnok yimtsüing ter dak tema aser arrtsü nung amenoka lir, ta osang ajanga metetdaksüogo.

Israel military otongdar Nadav Shoshani-i ashiba agi, tenem nung aliba tongtimbang tesem pongubo vantage point ama aser northern Israel nung alirtem nem teküzmzükba agütsütsü asoshi metoktsütsü.

Paisa, United States-i anir ceasefire asadangba lokti tenteti khi atema iba jenjang agia atatsü asoshi agizükogo, ta ashi.

Lebanon tir Joseph Aoun-i, atakzükja aliba mapang tashi nung Israel nunger sepaitem ajungabo mainshitsü ta shisabulua bilemba lemsatepogo aser ashiba agi Israel nunger dak temulunglemtsü mali.

Hezbollah lenir Naim Qassem-i Deobarnü ashiba

agi, Israel nungertem Leba-non nungi atsügingintsü atema menomeyangba atema taitok kecha magütsütsü.

Ajisüaka Israel indang Minister of Defense Israel Katz-i Mongolbarnü sangdong ka ajanga, parnok tesem pongu nungi mainshitsü aser iba anema Hezbollah-i jenjang agira parnoki telangzüba tapet agütsütsü ta tekümdangtsü metetdaksüogo.

Hezbollah aser Israel na ceasefire benoktsü atema November ita mulungtepa liasü. Israel-i Gaza amakba atema telangzüba agüja Iran den sendaktepa aliba telok yagi rocket amshia northern Israel amak tenzükba sülen arrtsü adena rara tenzüka ita aika raraba sülen ceasefire benoka liasü.

Iba sülen Israel-i meyiper Lebanon nung tesem balala amak tenzüker aser nisung 4000 dak tema tepseta liasü, ta Ministry of Public Health-i metetdaksüogo.

United States aser France nati achaayanga yangluba tenangzüktepba kübok anogo 60 tsüingda Israel nunger sepaitem atsüginginba mapang United Nations peacekeepers tem den külemi Lebanon military linük south leni yoktsü nangzükteper lir. Hezbollah pur arrtsü nungi km 30 shi pilar Litani ayong ajanga atsügingintsü aser iba tesem nung tanungba military infrastructure tem loksatsüla.

Israel nunger sepaitem atsügingintsü atema atakzüksüba anogoji January tatemlen liasü saka February

18 tashi atsülangja liasü.

Ajisüaka Israel military-i Hombarnü sangdong ka ajanga parnok arrtsü nung tongtimbang tesem pongu nungibo mainshitsü ta metetdaksüogo.

Israel-i parnok sepaitem ajunga anintsü memulungba ajanga ceasefire atema nangzüktepba aliba ya koma tembangtsü mejangjai kümogo.

Ceasefire benoker liaka iba anema Israel-i tesem balala maka arudar aser ashiba agi parnoki Hezbollah purtem makdar. Ajisüaka Hezbollah puri iba taitsüba ya magizüki arudar.

Israel-i November 27 nungi January 10 nü tashi nung anüing ajanga tesem 330 amakba aser kiojen 260 raksatsüba Armed Conflict Location and Event Data (ACLED) project-i mangaoka lir.

Ketdangsürtemi ashiba agi, rara ajanga teraksatsüba bener arutsüba ya yanglushitsü atema USD bil-lion 10 dak tema aotsü aser UN-i ashiba agi, nisung 100,000 pei talidak ki toktsür jenshia or lir.

Lebanon nung ketdangsürtemi Israel nunger sepaitem atsügingintsü atema mapa atsülangba magizüksü ta Hombarnü metetdaksüogo aser sponsor tem dang Israel nongshitsü mepeshia metetdaksüogo.

Ato Kilonser Benjamin Netanyahu-i, ceasefire benoktsü atema Israel-i takokba tashi inyaktsü ta ashiba den Hezbollah pur ya samatsütsüla ta shiogo.

Ni meyipa arutsü, linük asoshi takum agütsür mang ayangtsü: Hasina

Dhaka, Tsüklai/February 18 (Agencies): Bangladesh taoba ato kilonser Sheikh Hasina-i video ka ajanga jembidang linüki meyipa shilangtsü aser Awami League züingsem aser police kar asüba atema mang ayangtsü nangzüker aser ibai yimtenren azüdokshi nung linük asoshi takum agütsür ta ashi. La taoba küm August 5 nü ato kilonser menden nungi atsüingdokba sülen virtual yimya nung tanaben jembidang lai iba olen ya süoka jembia, shiba tesüiba ita tenet political exile nung alir.

Mejangjaba tesem ka nungi jembidang taoba Bangladesh ato kilonseri amitsür pongu aserparnok tanurtem den Zoom ajanga sendaktepa jembia, koba

Awami League (Europe chapter) indang tir Nazrul Islam onir sür agia liasü.

Lai minute 45 shi jembia aser iba indang YouTube live ya tesem balala nungi nisung 7000-8000 tsüingtai repranga liasü.

"Ni nenok ajak dang aremzüka aser lungjema alitsü ayongzüker. Ni meyiba arutsü aser asen martyrs mang ayangtsü. Ni tamalen inyakba ama ochi obendang asoshi inyaktsü. Kü o züingzünga nenok mulung nung yuang," ta Hasina-i mangyimer kibongtem dang ashi.

Iba ama azüdokshi aser tim masüba mapa inyakba atema lai Nobel Prize angur aser interim government indang chief adviser

Muhammad Yunus tenüing asen.

"Allah-i kü nem takum tanabuba agütsü aser ibaji langka tajung ka atema atalok südi ta ni amanger. Taoba mapanga parnoki ni tepsettsü merang aser parnoki ano (August 5) ni tepsettsü merang. Saka ni takum jenbu, aser ano meyipa shilangtsü. Ni ochi mapa inyaktsü-. Asenok ajak den Allah lir," ta lai ashi.

"Yunus-i sorkar ka anitsü yimya kecha memetet. Pai inquiry committee ajunga anentsü aser nisung tepsettsü kiralongrar tem yok. Parnoki Bangladesh samatsür. Asenoki iba kiralongrar sorkar atsüingdoktsü," ta taoba Bangladesh PM-i ashi.

MULUNGEN O



Onoki kodanga amadoktsü makokba temeim Ojala **Mrs. Pangerangla (Waromung)** shiranga alidang nungi tasü mapang tashi nung Arogo, Yimten, Kiyonger, Medemertem aser Lokti balala ana aser talang nungi shirnokisa sarasadem, nübo, shisatsü aser rongsen tajungtiba agi ozü mulung süngzükdakja yaritepogo, nenok ajak dang ozü mulung taroktiba agi pelaba lemsateper aser ajak ateta angusang Tsüngremi nenok mapa tajung lepa moajangma ta ozü Sarasadem. **Temeim chirnur aser kinungertem.**

SANGDONGER

Chümoukedima Village Council Ali Patta aser No Objection Certificate aoyaa amshiba puteta, Ao Senso Telongem Chümoukedima (ASTC) ajanga Wb. Supongtemjen Pongen (Longmisa) S/o Wb. Imsentemsu Pongen, Thahekhu Block-7, Dimapur jila nung talidak, pai Head GB aser Council Chairman Seal, Signature aser Letter Head amshia Ali Patta aser No Objection Certificate duplicate yanglua mashim nung amshiba agi pai aibelenba dak alang ASTC, 2025 Ozüingtem nung tapet Ocet agi merenshi aser pai tanaben iba ama Aor nem tenüing menük tarutsü nung bener marudaktsütsü ta pangzüngteba sangdonger.

Sd/-
(Dr. Moa Walling)
Tir, ASTC

Sd/-
Wb. Lensanir Sanglir
Tongti Zülur, ASTC

PELABA LEMSATEPER

27 January, 2025 anogo kironng lendong nung tesama tulu ataloker alidang onok kibong dak malangba yaritepertem kija kibong aser lokti tentet balala ajak dang kanga dang pelaba lemsateper. Iba den meshi melitet nung yimden aser arogo kar yamai lemsateper.

1. District Administration Mokokchung
2. Fire Department Mokokchung
3. SDRF Mokokchung
4. PS-II Marepkong
5. Assam Rifle
6. Ex-Serviceman Association
7. Indian Red Cross Society
8. Ungma Village Council.
9. Mokokchung Village Council
10. Unger Village Council
11. Settsu Village Council.
12. Khensa Village Council
13. Changki Village Council
14. Kilangmen Village Council
15. Kupza Village Council
16. Ongpangkong Mungdang
17. Ongpangkong Kaketshir Mungdang
18. Ongpangkong Tetsur Mungdang
19. Ungma Senso Telongjem Mokokchung.
20. Ungma Senso Telongjem Alichen
21. Ungma Baptist Arogo.
22. Ngati Baptist Arogo.
23. Settsu Baptist Arogo.
24. Mekuli Baptist Arogo.
25. Tzusapang Baptist Arogo.
26. Changki Yimlang Baptist Arogo.
27. Changki Baptist Arogo.
28. Longsa Baptist Arogo.
29. Longkum Baptist Arogo.
30. Kinunger Baptist Arogo.
31. Mokokchung Baptist Arogo.
32. Kumlong Baptist Arogo.

Iba dak alia ano kija kibong aser Lokti tentet aika lir nenok tenung meshiaka tulusang Tsungremi nenok Kibong aser Telok moajang ta ozu sarasadem.

Ki Arongertem
Mejungnangpong Jamir
Shipongmar Jamir
Ungma Village Mokokchung

Babar Azam nem ICC T20I Team of the Year 2024 cap agütsü



Tsüklai/February 18, 2025

(Agencies): Champions Trophy tenzüksü lia Pakistan nung nungtugu batter Babar Azam nem ICC Men's T20I Team of the Year 2024 cap agütsüogo.

Arishi kum 31 tain batter ya T20I nung kanga junga asayaba atema taoba ita iba team nung züngoksemba sangdonga liasü. New Zealand den mezügbuba asaya asayatsü lia ICC-i Instagram nung video ka ajanga Babar-i cap agizükba video ka lemsatapa liasü.

"ICC T20I Team of the Year 2024 cap ya Babar atema shitak," ta ICC-i zülutsü.

2024-i Babar-i kanga jung asaya-a asaya 24 nung run 738 yanglua liasü, kong half century trok yangluba densema lir. Pa ya asaya yimya kanga ajunga atema kanga nungtugu lir aser pa kum tepeyong Pakistan team nung kanga tongtiban asayar ka liasü.

2024 kum pai New Zealand den asayaba mapang asaya asem atonga half cen-

tury yanglua tenzüik aser maneni kanga junga asaya yonga oa pa alima nung T20I batter tem rongnung tajungtibaka ta pa jenjang yanglushi.

T20I nung kanga junga asayaba sülen Pakistan team Bodhbarnü Karachi nung Champions Trophy tenzüikba mapang Babar ODI nunga tongtiban shilem agitsü rangloker lir.

Iba asayamung masaya tsüngda Pakistan team-i New Zealand aser South Africa na den ODI tri-nation series nungbo junga masayateti liasü. Kidang asayaba mapang Pakistan team-i final densema asaya ana tashi nung tamakok ngua liasü.

Kasa mapang nung Babar-i iba asayamung nung junga masayatet aser asaya asem nung run 62 dang yanglua liasü. Champions Trophy tesüsabuba ya Pakistan-i koker lir aser parnoki iba title defend asütsü merangba mapang Babar-i tongtiban shilem agitsü imlar.

Lockie Champions Trophy masayatettsü



Tsüklai/February 18, 2025

(Agencies): New Zealand nung fast bowler Lockie Ferguson tetsüing yiruba sülen ICC Champions Trophy 2025 nung masayatettsüa kumogo, koba NZ asoshi Pakistan den mezügbuba asaya masaya tsüngda takoksa tulu asütsü.

Deobarnü Karachi nung Afghanistan den informal warm-up asaya ka asayaba mapang Ferguson tetsüing tachichilen timtem adoka liasü. Tetsüing asadanga sülen pa iba asayamung nung asayatsüa taneptsü mongutettsü ta asatetogo aser pa rehabilitation atema kidangi meyipa yoktsü teletetba agiogo.

Ferguson melena fast

bowler Kyle Jamieson shimogo aser pa Pakistan-i M o n g o l b a r n ü nikongtsütsüogo.

Jamieson, teberem yiruba sülen ita ter masayai lir December ita Super Smash nung Canterbury nungi asaya-a domestic cricket asayshi tenzüikogo.

Iba asayamung nung Canterbury pur final tonga asayaba nung pai tongtiban shilem agiogo. Asayamung nung pai wicket 14 agia tanga asayar ka den asayamung nung wicket timtiba agiba asayar rongnung tanabuba liasü.

New Zealand head coach Gary Stead-i, iba asayamung nung Ferguson

masayatettsüa akümiba ya team atema takoksa tulu ta shiogo.

"Lockie atema onok kanga tezü adanger," ta Stead-i ashi. "Lockie ya bowling nung kanga tongtiban asayar ka lir aser pa tajangshiba aika bena aliba asayar ka aser asayamung tongtiban ka nung New Zealand tenüing nungi asayatsü atema pa koda yonga ata liasü aji onoki meteta lir. Pa yakta taneptsü ngua asaya tenzüksü imlaja atar," ta paisa shisem.

Stead-isa, team nung Jamieson densemba indang jembia liasü.

"Kyle ya ball kanga kar aoner ka aser iba den ball bounce südakja aonba asayar ka, anungji pa Pakistan nung asayatsü tapet asütsü. Super Smash nung asaya tenzüikshiba sülen pai pa iba asaya short format nung koda tedangshi aji sayuogo aser iba den pai tashi ajak agi ball kanga kara oner, koba pace bowler ka nungi imlar," ta Stead-i ashi.

Champions Trophy nung New Zealand pur mezügbuba asaya Pakistan den Bodhbarnü Karachi nung asayatsü.

Boulter aser Raducanu na Queen's club nung asayatsü

Tsüklai/February 18, 2025

(Agencies): British number one Katie Boulter aser taoba US Open champion Emma Raducanu na June ita Queen's Club nung tetsür asayamung ka nung asayaba angutsü.

Australian Open champion Madison Keys, Grand Slam ana tashi koker alila Naomi Osaka aser taoba kum Eastbourne champion Daria Kasatkina nungera iba asayamung nung shilem agitsü jangjaogo, koba June 7 nungi 15 tashi asayatsü.

1973 kum sülen takum mezügbuba Queen's Club nung tetsür asayamung ka asayatsü lir. Olga Morozova-i tesüsabuba asayamung tetsür kija asaya koka liasü.

"Ni ina atuba mapang kumshia teburtem asayamung repranga aruogo aser iba amala kanga dang teushi asayamung ka nung shilem agitsü maongka anguba ya tetushi tulu lir," ta Boulter-i ashi.

"Queen's nung alima nung tetsür asayar tajungtiba kar asayatsü lir aser iba ajanga British grass court asayamung khenyongi jenjang balakati bener atutsü.

"British nung asayar ka ama takum iba asayamung

akoktsü ya pungmang atalokba ka asütsü aser ni takok tashi meranga asayatsü. Asenoki lemluwa otsü tasen talila yangludi," ta laisa shisem.

Boulter 2023 kum June ita nungi Britain tsürtem rongnung number one asayar lir aser lai 2023 aser 2024 kum Nottingham nung grass court asayamung akokba densema WTA titles asem bener lir.

Raducanu, shibai 2021 kum US Opn koka liasü, la yiruba ajanga mapang talangka masayai aruba sülen taoba kum asaya tenzüikshia lai Nottingham nung semifinal atong, Eastbourne nung quarter-finals atong aser Wimbledon nung round of 16 tonga asaya liasü.

"Katie, Emma, Madison aser Naomi nung June ita HSBC Championships nung asayatsüba osang pelashishia sangdonger," ta WTA HSBC Championships tournament director Laura Robson-i ashi.

"Fan temi alima nung tetsür asayar tajungtibatem kar iba asayamung nung asayaba angutsü, kong Grand Slam champions asem aser British number one asayar dena lir," ta laisa shisem.

Cristiano sen timtiba aazükba asayar kumogo

Tsüklai/February 18, 2025

(Agencies): Portugal nung nungtugu asayar Cristiano Ronaldo maneni alima nung sen timtiba aazükba asayatem rongnung temaba jenjang nung lir.

Ballon d'Or pongu tashi ngur aliba asayar yagi 2024 kum USD million 260 aazüka liasü. Arishi kum 40 tain asayari sen ya timba Al Nassr nung takok anguba aser itasen nungi aazüka liasü. Al Nassr den tenangzütepba yanglur aliba nungi pai taoba kum USD million 215 aazük aser tanga endorsements nungi USD million 45 aazüka liasü.

Iba ajanga pa Lionel Messi jakdang toktsüogo, shibai USD million 135 aazüka pezububa nung lir.

Takum kum tetenzüklen Cristiano Ronaldo-i Al Nassr toktsütsü akok ta jembia liasü, saka osang ajanga ashiba agi, pai ano kum ka atema t e n a n g z ü k t e p b a yanglushitsü. 2022 kum December ita Ronaldo-i alima ajak aoksadakja Europe nungi ainshia Saudi-i oa liasü. Manchester United nung junga masayatetba mapang ka nung pa Al Nassr nung oa aden.

Brazil nung asayar Neymar-aiba list nung trokbuba nung lir. Pai 2024 kum USD million 133 aazüka liasü. France nung nungtugu football asayar Karim Benzema aser Kylian Mbappe na ti aser tekububa nung lir.

BILEMDANGANG

"Nai lenmang kecha mongura lemang tasen ka mesapokang."